



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-566/02

Sarajevo, 29. maja 2002.

Z A P I S N I K

sa 26. sjednice Predstavničkog doma Parlamentarne skupštine Bosne i Hercegovine,
održane 29. maja 2002. godine

Sjednica je počela s radom u 11,15 sati. Početku sjednice prisustvovalo je 39, a pred kraj 40 poslanika (zakasnio je poslanik Zoran Spasojević). Odustvo su opravdali Ljubomir Kovačević i Amor Mašović.

Kao gosti sjednici su prisustvovali predsjedavajući Predsjedništva Beriz Belkić i članovi Predsjedništva Živko Radišić i Jozo Križanović, te predsjedavajući Doma naroda Nikola Špirić. Iz Vijeća ministara prisustvovali su predsjedavajući Dragan Mikerević, ministri Ante Domazet, Svetozar Mihajlović, Zlatko Lagumdžija i Krešimir Zubak; zamjenici ministara Gordana Ković, Rasim Kadić, Muharem Imamović, Vladislav Vladičić, Jusuf Halilović.

Iz međunarodnih organizacija sjednicu su pratili J.P. Hoteldahl, predstavnik OHR-a, Vilma Theuns – predstavnik OSCE-a, Paul Labun – NDI, Vesna Bosiljčić EMM i Mirsad Žiga, ispred Američke ambasade u BiH.

Predsjedavajući Doma Mariofil Ljubić predložio je za sjednicu prijedlog dnevnog reda koji su poslanici dobili u pozivu za sjednicu, kao i tri tačke koje su skinute sa 25. sjednice.

O Prijedlogu dnevnog reda nije bilo diskusije, pa je, sa 36 glasova ZA (u momentu glasanja prisustvovalo 36 poslanika) za 26. sjednicu usvojen sljedeći

D N E V N I R E D:

1. Prijedlog budžeta institucija BiH i međunarodnih obaveza BiH za 2002.,
2. Prijedlog zakona o izvršenju Budžeta institucija BiH i međunarodnih obaveza BiH za 2002. godine,
3. Formiranje privremene komisije radi utvrđivanja činjenica u vezi s prodajom oružja Izraelu i Kamerunu,
4. Formiranje istražne komisije za ispitivanje slučaja pronalaska oružja u Mostaru i
5. Donošenje rezolucije u vezi s upotrebom terminologije u skladu s Dejtonskim sporazumom.

Ad. – 1: Prijedlog budžeta institucija BiH i međunarodnih obaveza BiH za 2002.

Obrazloženje Prijedloga budžeta Doma su podnijeli predsjedavajući Predsjedništva BiH Beriz Belkić i ministar za trezor institucija BiH Ante Domazet.

U diskusiji u prvom čitanju učestvovali su Miloš Jovanović, Bogić Bogićević i Ramiz Vilić. Potom je Dom, sa 35 glasova ZA i jednim suzdržanim usvojio u prvom čitanju Prijedlog budžeta institucija BiH i međunarodnih obaveza BiH za 2002. godinu.

Poslije usvajanja Prijedloga budžeta u prvom čitanju predsjedavajući je dao pauzu od pola sata radi održavanja sjednice Kolegija u proširenom sastavu.

Nakon pauze predsjedavajući je upoznao poslanike da je sjednica Proširenog kolegija održana radi konsultacija u vezi s podnesenim amandmanima, kojom prilikom je bilo prijedloga da se pokuša postići dogovor da poslanici odustanu od amandmana. Naglasio je da dogovor nije postignut, pa je otvorio raspravu o Prijedlogu budžeta u drugom čitanju.

U vezi s Prijedlogom budžeta i amandmanima vođena je duga diskusija u kojoj su učestvovali: Momir Tošić, Adem Borić, Mirko Banjac, Osman Brka, Mirko Grabovac, Željko Mirjanić, član Predsjedništva Živko Radišić, Salih Kulenović, Sead Avdić, Abdurahman Malkić, Damir Mašić, Mirko Mijatović, Bogić Bogićević, Dušan Stokić, Boro Bjelobrk, Ibrahim Đedović, Tihomir Gligorić, Mustafa Cuplov, Hilmo Neimarlija, Marko Amidžić, Sead Buturović i predsjedavajući Predsjedništva Beriz Belkić.

Poslije diskusije predsjedavajući je na glasanje dao amandmane na Prijedlog budžeta, kako slijedi:

Amandman Abdurahmana Malkića na član 6., u tabeli 1. tačka 4. Ministarstvo za ljudska prava i izbjeglice – dodati novu tačku 4. 2. koja glasi: Podrška projektu “Program za Srebrenicu” - 1,000.000 KM.

ZA glasalo 26, suzdržalo se 12 poslanika. Po entitetima, iz FBiH ZA glasala 23, iz Republike Srpske 3 poslanika. Amandman nije dobio entitetsku većinu, te ide u postupak usaglašavanja.

Amandman Kluba poslanika SDP-a na član 3. DIO – RASPOREĐIVANJE – u tabeli 3.2. Predsjedništvo BiH, u okviru tačke IV Programi posebne namjene – definisati novu poziciju 3. Agent za zastupanje tužbe, sporova i arbitraža BiH pred Međunarodnim sudom pravde u Hagu – 910.000 KM.

ZA glasalo 21, protiv 5, suzdržanih 7. Po entitetima, iz Republike Srpske ZA glasala 3, iz Federacije BiH 21. Amandman takođe ide na usaglašavanje.

Amandman Mirka Banjca – Stavku Budžeta 3.28. REZERVISANJA, redni broj 1. Tekuća rezerva, umanjiti za iznos od 436.414,00 KM, a sredstva prebaciti kod budžetskog korisnika Ministarstvo za ljudska prava i izbjeglice, redni broj 3.3. Tekući grantovi – Program izbjeglica.

Amandman nije dobio većinu prisutnih. Od 38 ZA glasalo 5, protiv 27, suzdržana 3.

Amandman I Kluba SDA – u članu 3. podnosilac II DIO: RASPOREĐIVANJA, u tabeli 3.2. PREDSJEDNIŠTVO BiH u okviru tačke IV Programa posebne namjene, ubaciti novu poziciju koja glasi: “3. Agent pred Međunarodnim sudom pravde u Hagu – 436.414,00 KM.”

ZA amandman glasalo je 14, protiv 10, suzdržalo se 13 poslanika. Po entitetima, iz Federacije BiH ZA glasalo 12, iz Republike Srpske 2. Prema tome, amandman ide na usaglašavanje u Komisiji Kolegija.

Amandman II Kluba SDA – u članu 3. tabela 3.28. REZERVISANJA, tačku 1. Tekuća rezerva umanjiti za iznos od 436.414,00 KM.

ZA amandman je glasalo 14, protiv 10, suzdržalo se 13 poslanika. Po entitetima, iz Republike Srpske ZA glasalo 2, iz Federacije BiH 12 poslanika. I ovaj amandman je dobio većinu prisutnih, ali ne i entitetsku, te ide na usaglašavanje.

Pošto se Dom izjasnio o amandmanima predsjedavajući je na glasanje dao prijedlog zaključaka koje su u diskusiji iznijeli poslanici Ramiz Vilić i Mirko Banjac.

Dom je usvojio prijedlog zaključaka Ramiza Vilića – da se izanalizira visina javne potrošnje, te prigodom predlaganja rebalansa budžeta institucija BiH istu svesti u razumne okvire.

ZA zaključak je glasalo 26, suzdržalo se 9 poslanika. Po entitetima, iz Republike Srpske ZA je glasalo 7, iz Federacije BiH 20 poslanika.

Prijedlog zaključka Mirka Banjca – Osuđuje se kao neprihvatljivo izlaganje Osmana Brke koje je u dijelovima terminološki suprotno Dejtonskom sporazumu, nije usvojen. ZA je glasalo 9, protiv 23, suzdržalo se 6 poslanika.

Poslije izjašnjavanja o predloženim zaključcima predsjedavajući je predložio da se pređe na razmatranje 2. tačke – Prijedlog zakona o izvršenju budžeta u prvom i drugom čitanju, pa da se istovremeno provede usaglašavanje o amandmanima na Budžet i o amandmanima na Prijedlog zakona ukoliko budu prošli na usaglašavanje. Međutim, Klub poslanika SDS-a zatražio je pauzu od pola sata.

Pauza je potrajala mnogo duže nego je planirano, pa su u nastavku sjednice na to prigovorili poslanici Damir Mašić i Sead Buturović.

Predsjedavajući Mariofil Ljubić obavijestio je Dom da je u pauzi Kolegij proveo postupak usaglašavanja o amandmanima na Prijedlog budžeta i da o amandmanima nije postignuta saglasnost, kao i da je stav Kolegija da se rad nastavi na 1. tački.

Na prigovore zbog dužine pauze predsjedavajući je odgovorio da je to bilo iz razloga što nije postignut kompromis da se povuku amandmani, jer su zbog amandmana bila potrebna duža usaglašavanja.

Predsjedavajući Kluba SDS-a Momir Tošić, odgovarajući na prigovore zbog dužine pauze, pored ostalog, rekao je da je on tražio pauzu isključivo iz razloga da se danas konstruktivno, prema zahtjevu međunarodne zajednice i MMF-a usvoji Budžet, a da bi nešto usaglasili za to treba vremena.

Poslije ovih kraćih diskusija predsjedavajući Ljubić je pozvao Dom da se izjasni u drugom krugu o amandmanima o kojima nije u Komisiji Kolegija postignuta saglasnost.

Amandman Abdurahmana Malkića – od prisutnih 39 ZA je glasalo 27, protiv 10, suzdržana 2. Po entitetima – iz FBiH nije bilo glasova, protiv, iz Republike Srpske protiv je glasalo 10 poslanika, što su 2/3 glasova protiv iz entiteta. Prema tome, amandman nije usvojen. Takođe nisu usvojeni u drugom krugu ni amandmani:

- **Kluba SDP-a** – ZA glasalo 25, protiv 11, suzdržana 3. Iz Republike Srpske protiv glasalo 10, iz Federacije BiH protiv 1;

- **Amandman I Kluba SDA** – ZA glasalo 14, protiv 10, suzdržalo se 14; Iz Federacije BiH protiv glasao 1, iz RS protiv 10;

- **Amandman II Kluba SDA** – ZA glasalo 14, protiv 11, suzdržalo se 14. Iz Federacije BiH protiv glasao 1, iz Republike Srpske protiv 10.

Poslije izjašnjavanja o amandmanima u drugom krugu predsjedavajući je na glasanje dao Prijedlog budžeta.

ZA je glasalo 30, protiv 8, suzdržao se 1 poslanik. Po entitetima, iz Federacije BiH ZA je glasalo 20, iz Republike Srpske 11 poslanika.

Predsjedavajući je konstatovao da je usvojen Budžet institucija BiH i međunarodnih obaveza BiH za 2002. godinu.

Ad. – 2: Prijedlog zakona o izvršenju Budžeta institucija BiH i međunarodnih obaveza za 2002. godinu

U prvom čitanju o Prijedlogu zakona nije bilo diskusije, pa je isti usvojen jednoglasno. Odmah se prešlo na razmatranje Prijedloga zakona u drugom čitanju.

Predsjedavajući Ljubić je podsjetio da su na Prijedlog zakona amandmane podnijeli Emina Zaćiragić i Željko Bilbija u ime Kluba poslanika PDP-SNS-SNSD-SPRS.

U diskusiji u drugom čitanju učestvovali su Emina Zaćiragić i Željko Bilbija, a potom je predsjedavajući amandmane dao na glasanje.

Amandman Emine Zaćiragić – u članu 5.1. iza stava 5.1.2. dodaje se novi stav 5.1.3. koji glasi: “O upotrebi sredstava budžetske rezerve za finansiranje troškova međunarodnih sporova i arbitraža odlučuje Predsjedništvo Bosne i Hercegovine”.

ZA amandman je glasalo 25, protiv 10. suzdržao se 1 poslanik. Po entitetima iz RS ZA su glasala 3, iz Federacije BiH 22. Prema tome, amandman nije dobio entitetsku većinu i ide u postupak usaglašavanja.

Amandman I Željka Bilbije podnesen u ime Kluba – član 5.1.1. mijenja se i glasi: “Sredstva budžetske rezerve mogu se koristiti samo kao: nedostajući iznosi sredstava za budžetske korisnike i izdvajanja za nastale vanredne okolnosti”.

ZA je glasalo 11, protiv 14, suzdržano 4. Znači nije dobio većinu.

Amandman II Željke Bilbije – član 5.1.2. mijenja se i glasi: “Transferi sredstava iz budžetskih rezervi mogu se realizovati samo na osnovu pojedinačnih odluka koje Vijeće ministara donosi konsenzusom”.

ZA je glasalo 11, protiv 24, suzdržana 4. Amandman također nije dobio većinu prisutnih.

Predsjedavajući je upoznao Dom da se članovi Kolegija nisu usaglasili o amandmanu Emine Zaćiragić, te je isti dao na glasanje u drugom krugu.

Od 39 prisutnih ZA je glasalo 25, protiv 11, suzdržana 3 poslanika. Po entitetima, iz Republike Srpske protiv je glasalo 10, iz Federacije BiH 1. Prema tome, amandman nije usvojen.

Potom se Dom izjasnio o Prijedlogu zakona.

ZA je glasao 31 poslanik, protiv 8, suzdržao se jedan. Po entitetima, iz Federacije BiH ZA je glasalo 19, iz Republike Srpske 10.

Predsjedavajući Ljubić je konstatovao da je Dom usvojio Prijedlog zakona o izvršenju Budžeta institucija BiH i međunarodnih obaveza BiH za 2002. godinu.

Ad. – 3: Formiranje privremene komisije radi utvrđivanja činjenica u vezi s prodajom oružja Izraelu i Kamerunu

U okviru ove tačke diskutovali su Sead Avdić, Osman Brka, Marko Amidžić, Željko Mirjanić, Boro Bjelobrk, Abdurahman Malkić, Željko Bilbija, Mustafa Cuplov, Mirko Baković i Bogić Bogićević.

Poslije diskusije Dom je usvojio zaključak o formiranju Privremene komisije radi utvrđivanja činjenica u vezi s prodajom oružja Izraelu i Kamerunu. U komisiju s izabrani: Ramiz Vilić, Miloš Jovanović, Mirko Banjac, Zdenko Vukić, Ivo Lozančić i Halil Mehtić.

ZA zaključak je glasalo 27, protiv 1, suzdržala se 4 poslanika. Po entitetima, iz Republike Srpske ZA je glasalo 11, iz Federacije BiH 15 poslanika.

Ad. – 4: Formiranje istražne komisije za ispitivanje slučaja pronalaska oružja u Mostaru

U diskusiji su učestvovali Marko Amidžić, Željko Mirjanić i Mirko Mijatović. Potom je Dom usvojio zaključak o formiranju Istražne komisije za ispitivanje slučaja pronalaska oružja u Mostaru. U Komisiju su izabrani: Miro Grabovac – Titan, Ramiz Vilić, Mirko Mijatović, Bahrija Osmanović, Marko Amidžić, Mariofil Ljubić i Zoran Spasojević.

ZA zaključak je glasalo 20, protiv 3 suzdržalo se 10 poslanika. Po entitetima, iz Federacije BiH ZA je glasalo 11, iz Republike Srpske 8.

Ad. – 5: Donošenje rezolucije u vezi s upotrebom terminologije u skladu s Dejtonskim sporazumom

U okviru ove tačke kraće su diskutovali poslanici Damir Mašić, Boro Bjelobrk i Sead Buturović.

Predstavnički dom nije usvojio Prijedlog rezolucije. Od prisutnih 38 ZA je glasalo 12, protiv 22, suzdržala se 2 poslanika.

Ovim je iscrpljen dnevni red 26 sjednice.

Predsjedavajući je sjednicu zaključio u 20,15sati .

Sastavni dio ovog zapisnika je transkript 26. sjednice Predstavnički dom.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Mariofil Ljubić

